

# 1 JUAN

## 1 Juandih jwí túi beh joyát pínah naáwát

¿Déhe tiguaá daácniji? Jon játih Jesúhwa maáta “Juan, Jesús chah á oini, á bohéni, á naáwát tútuniji nin náodih át daacáp tají”, íť níj naáwáp wut jí. Caanjéh muntih San Juan, 2 Juan, 3 Juan, Apocalipsisdihbut daácní át jumap wut jí.

¿Dedih át daácji? Juanjeh daácna, “Jesúhwádih wá daácna caá”, (2.12-14,19; 3.1; 5.13) át níj daacáp tají. Obohjeéhtih, dedjih moondih daácna, át niicáp tají.

¿Dedmant, débólih cah, át daácji? Chah jéihnit “Jópchi 85—95 (Jesús á wunat túttimah 52—62 jópchi túttimah) nin náodih Juan át daac wahap wut jí”, í níj jenah joiná caá.

¿Dedé pínah tiguaá át daácji? Jesúh doonádih yee naóhnit, “gnósticos”, í niijní, con láa dawá pehbóó í yee bohénachah, Jesúhwa í yee bohéatdih í joicát pínah niijná, nin náodih Juan át daac wahap wut jí. Jesúhwa á túi ubnit í jumatdih í túi jéihyat pínah niijnábút, át daac wahap wut jí.

Ded pah 1 Juan á jumat:

1. Juan á naóh jwííhat — Jesús á cáac jumata dooná yoobópdih á jumata (1.1-4)
2. Jesúhwa ájeéh, á ípjeéhbút í túi jumata (1.5—2.28)
  - a. Túi chájnít, íjeéh jwí túi jumata í jútat (1.5-7)
  - b. Jwí yéej chájat Diosdih naáwát caá náahap (1.8—2.2)
  - c. Jesús á wutatdih jepahata caá náahap (2.3-6)
  - d. Bitá Jesúhwádih oyata caá náahap (2.7-11)
  - e. Wébitdih, behnitdih, japatadihbút á naáwát (2.12-17)
  - f. Jesúhwa jumna, ded pah Jesucristodih jwí jenah joyát (2.18-28)
3. Jesúhwa jumna, Dios weh jwí jumata (2.29—4.6)
  - a. Túi chájnít, bitadih oinit, Dios weh jwí jumata (2.29—3.24)
  - b. “Jesucristo Dios wúéh jumna, cáac yoobátbút á jumna caá”, niijnít Dios weh jwí jumata (4.1-6)
4. Jesúhwa jwí jumatajeh jéihyat tút niijná, ded pah jwí jumata náahap (4.7—5.12)
  - a. Dios á oyatjih bitadih oinit, queétdih túi chájata caá náahap (4.7—5.5)
  - b. Dios á wahni Cristo á jumatajehbut jenah joyát caá náahap (5.6-12)
5. Juan á pée naáwát (5.13-21)

### Jesucristo ded pah á jumata

**1** Ded pah Jesucristo á jumatajeh yeebdih wá naóh daácna caá. Jesucristo bíhmah jumni,\* ded pah Dios á jumatajeh naóhni, cáacwá Diosjeéh páantjeh jumata tútunibút át jumap wut jí. Dios cáacwádih ded pah á naáwátjeh Jesúboó naóh yapani á jumap jí. Á naáwáchah joinít, jwiítjeh caandih jwí enep jí. Jwiítjeh á duó wáyachah, caandih jwí pej jumap jí. <sup>2</sup>Jesucristo

cáacwádih páantjeh jumata tútuní, nin baácboó á júwát pínah játih á íp Diosjeéh jumni nin baácboó át cáac jumap tají. Caandih ennitji buu áih doonádih yeebdih wá naóhna caá.\* <sup>3</sup>Jwí íp Diosjeéh, á wúéh Jesucristojeéhbút jwí túi jumna caá. Pánihna, yeeb jwíjeéh, jwí ípjeéh, á wúéhjeéhbút ní túi jumata pínah niijná, jwí ennitjehbut jwí joinítjehbut yeebdih wá naóhna caá. <sup>4</sup>Bícdih wéinit jwí jumata pínah niijná, nindih yeebdih wá daácna caá.

\* 1.1 Jn 1.1,4; 6.68; 1Jn 2.13-14 \* 1.2 Jn 1.14,18

### Baabát panhipboó jwí jumat

<sup>5</sup>Dios wūéh jwiítidih ā naóhni*ji* bohéátidih b̄w̄ yeebdíh wā naóhna caá. Dios túini yoobát jumna, baabát panihni caá. Dedé yéejat wihcah, dupúát caandíh ā wihcan caá. <sup>6</sup>Jwiít yeejép chājnit, dupúát panhipboó jumna yuhna, “Diosjeéh wā túi jumna caá”, niijnít, yeena caá jwí chājap. Dios ā náahat pah jwí chājcan caá. <sup>7</sup>Obohjeéhtih, túi chājnit, baabát panhipboó Dios ā jumat pah muntih jwiítbut jumna, ājeéh jwí túi jumna caá. Áihwājeéhbut jwí túi jumna caá. Caandíh jwí jepahat jíib, Dios ā enechah, ā wūéh Jesucristo cruzboó wun wūhni*t*, áih meépjíh jwiítidih yéejat wihcannit pah ā chājna caá.

<sup>8</sup>“Weém bácah yéej chājni nihcan caá”, niíf jenah joinít, yeeatdihjeh jwí jenah joiná caá. Páant niíf jenah joiná, Dios naáwátidih jwí túi jenah joicán caá. <sup>9</sup>Obohjeéhtih, jwí yéej chājatdih Diosdih jwí naáwáchah, caandíh ā quíib b̄w̄udbípna caá. “Dios yoobópdi*h* jumni ā niiját pah ā chājbi*pna* caá”, jwí niíf jéihna caá. <sup>10</sup>“Weém yéej chājni nihcan caá”, niíf jenah joiná, “Dios yeeni caá”, niijnít, ā naáwátidih jwí náahcan caá.\*

### Jesucristo jwiítidih ded pah ā teo wáacat

**2**<sup>1</sup>Wā weh panihnitá, yeéb yeejép ni chājcat pínah niijná, nindih yeebdíh wā daác wahna caá.\* Obohjeéhtih, jwí yéej chājachah, Jesucristo, yéejat wihcanni, ā ípdih jwiítidih ā naóh teo wáacbi*pna* caá. <sup>2</sup>Jwiít yéejnit jwí jumuchah, jwí yéejat Diosdih ā jāhna caá. Dios bícdih jwí túi jumat pínah niijná, Jesucristo jwiítidih ā wun wūh̄p jí.\* Jwiítidihjeh nihcan, nihát baácdih moón jwí yéejatdih yohat túut niijná, ā wun wūh̄p jí.

<sup>3</sup>Dios ā wutat pah chājna, “Ájeéh wā túi jumna caá”, jwí niíf jéihna caá.\* <sup>4</sup>Obohjeéhtih, bita “Diosjeéh wā túi jumna caá”, niijná yuhna, ā wutat pah chājcan, yeenit caá. Pánih yeenit, Dios

naáwátidih í jéihcan caá. <sup>5</sup>Obohjeéhtih, bífhboó ā wutat pah chājni Diosdih ā túi oina caá. Diosjeéh jwí túi jumatdih nin pah jwí jéihbi*pna* caá: <sup>6</sup>Ded Diosjeéh túi jumni Jesucristo ā chājat*ji* pah muntih caanbút ā túi chājbi*pna* caá.

### Jáap wutat

<sup>7</sup>Wā oinitá, yeebdíh b̄w̄ wā daá*cni* jáap wutat nihcan caá. Jon játih ni jéihni wutatjeh tigaá. Yeebdíh Jesúh doonádih jwí naáwáchah, nin wutatdihbut ni joyóp jí.\* <sup>8</sup>Obohjeéhtih, máa wutat yuhna, jáap wutatbut ā jumna caá.\* Cristo nin wutatdih jepahnit, jwiít cáacwádh̄but ā oyat túutap jí. Dupúát panhipboó ni jumuchah, Cristo nin baácna jūóhni*t*, caán dupúátidih ā baabánap jí. Pánihna, ā baabáat panhipboó jumnit, Cristo ā oyat túutatdih ni jepahna caá.

<sup>9</sup>“Weém baabápboó jumni Dios ā wutatdih jepahni caá”, niijná yuhna, ā dée panihni Jesúhdih enihcan, Dios ā wutatdih jepahcan, dupúnapboó jumni caá. <sup>10</sup>Ded ā dée panihnidih oini baabápboó ā jumna caá. Pánih oina, caandíh dedé buugát panihni ā wihcan caá.\* <sup>11</sup>Obohjeéhtih, ded ā dée panihnidih enihcan, dupúnapboó ā bejna caá. Pánih bejna, jéih encanni panihni ded pah ā chājatdih ā jéihcan caá.

### Cristodih túi jenah joyát ded pah ā jumat

<sup>12</sup>Wébitá, Cristo ā wun wūhatj*ih* ni yéej chājatdih át yohop taga. Pánih yéejat yohnit ni jumuchah, yeebdíh wā naóh daácna caá. <sup>13</sup>Behnitá, yeéb bihmahjeh jumni Cristodih ni túi jéihna caá. Caandíh túi jéihnit ni jumuchah, yeebdíh wā naóh daácna caá. Japatá, yeéb nemép*wā* í maáhdih nit yap yohop taga. Pánih yap yohnit ni jumuchah, yeebdíh wā naóh daácna caá.

<sup>14</sup>Wébitá, jwí ípdih ni túi jéihna caá. Caandíh túi jéihnit ni jumuchah, yeebdíh wā naóh daácna caá. Behnitá, bíhmahjeh jumni Cristodih ni túi jéihna caá. Caandíh túi jéihnit ni jumuchah, yeebdíh

\* 1.8-10 Pr 20.9 \* 2.1 Ro 6.11-14 \* 2.2 1 Jn 4.10 \* 2.3 Jn 14.15,21,23 \* 2.7 2Jn 5-6  
\* 2.8 Jn 13.34; 15.12 \* 2.8-10 Ro 13.12-14

wā naóh daácna caá. Japatá, Dios naáwátidih túi jepahnit, wēp ñuhnit panihnit ñi jumna caá. Pániñ jumnit, nemépwa í maáhdih ñit yap yohop taga. Páant ñi jumuchah, yeebdíh wā naóh daácna caá.

<sup>15</sup>Diosdih jéihcannit ded pah í en ñinahatdih ñi en ñinahca bojoó. Ded queét panihni jwí ípdih ā oican caá.\*  
<sup>16</sup>Diosdih jéihcannit nin pah í jumna caá: Yeejép chájatdih í en ñinahna caá. Bíf déedih wéi ennit, í bíbohíh jengah joiná caá. Dawá bíf déedih bíbohna, “Weém bita chah túini wā jumna caá”, í níj jengah joiná caá. Jwí ípboó páant ā jengah joyát túatcan caá. <sup>17</sup>Nin baác ā buudúchah, ded pah cáacwā yeejép í náah jengah joyátbut ā buudbírna caá. Obohjeéhtih, Dios ā náahat pah chájnitoobó páantjeh ájeéh í jumbipna caá.

#### Yoobópdih naáwát, yee naáwát

<sup>18</sup>Wehá, nin yeó jáapna buudát pínah tóah jüöhna caá ā chájap. “Cristodih túbit en jüihni ā jumbipna caá”, í níjíchah, ñiát joiná jí. Pániñna, buu dawá í jüúwátidih jéihnit, “Péeni yeó jáap bahniñeh ā júdhna caá”, jwí níj jéihna caá. <sup>19</sup>Queét Cristodih en jüihnit jwí cátlh jumna yahna, jwiítidih í éemp yoh bacap jí. Páant í bacatdih ennit, Jesúhwa yoobát í nihcatdih jwí jéihna caá. Queét áihwā nihna, jwíjeéh ita cháó tágaá. Jwíjeéh páantjeh í jumuchah nihna, Cristodih en jüihnit í jummatdih jwíta jéihcan tagaá.

<sup>20</sup>Obohjeéhtih, yeebdíh Túini Espiritu ā jumuchah, yeeb niñat Cristofh dooná yoobópdih ā jummatdih ñi túi jéihna caá.\*

<sup>21</sup>Yeebdíh naóhna, “Queét í túi jéihcan caá”, wā níj jengah joicán caá. Obohjeéhtih, túi jéihnit ñi jumuchah, yeebdíh wā naóh daácna caá. Caán dooná dedé yeeat ā wihcatdih ñi túi jéihna caá. <sup>22</sup>Nin pah caá yeeni ā níjíp: “Jesús Dios ā wahni nihcan caá”, ā níjina caá. Ded “Jesús Dios wūúh nihcan caá”, níj naóhni Jesucristodih, jwí íp Diosdihbut en jüihni caá. <sup>23</sup>“Dios wūúh Jesús nihcan

caá”, níjina jwí íp Diosjeéh ā túi jumcan caá. Obohjeéhtih, “Jesús Dios wūúh caá”, níjinoobó jwí ípjeéh ā túi jumna caá.

<sup>24</sup>Yeeb Jesúsdiñ jwíh jepahnit, ded pah ā jummat doonádh ñi joyóp jí. Páant ñi joyátjidiñ ñi túi náhninaá. Pániñ náhninit, Jesúsdiñ, ā ípdihbut ñi túi pej jumbipna caá. <sup>25</sup>Nin pah Jesús jwiít áihwádh ā níj naáwáp jí: “Yeeb wájeéh páantjeh ñi túi jumbipna caá”, ā níjíp jí.

<sup>26</sup>Yeebdíh yeenitdih ñi joyáh bojat pínah níjina, wā naóh daácna caá. <sup>27</sup>Jesucristo yeebdíh Túini Espiritudih át wūhup taga. Ñijeéh jumnit, yeebdíh ā túi bohéna caá. Yoobópdih bohéna, yeeatdih ā naóhcan caá. Páant ā bohénachah, bíh bohénidih ñi náahcan caá. Pániñna, ā bohéatdih joí cádahcan, Cristojeéh páantjeh ñi túi jumúé.

<sup>28</sup>Páant tigaá, wehá, Cristojeéh páantjeh ñi túi jumúé. Pániñ jumnit, ā jwúub dei jüúwáchah, úumcan, ñi tíccan níit. <sup>29</sup>Jesucristo túini ā jummatdih yeeb ñi jéihna caá. Pániñ jéihnit, niñat túi chájnitoobó Dios weh í jummatdihbut ñi jéihna caá.

#### Dios weh jwí jummat

**3** <sup>1</sup>Jwiítidih baini oican, “Yeebboó wā weh caá”, Dios ā níjina caá. Á oinit jumna, jwiít ā weh caá. Pániñna, yeej chájnitoobó Diosdih jéihcan, jwiít ā wehdihbut í jéihcan caá.\* <sup>2</sup>Wā oinitá, buu Dios weh jwí jumna caá. Obohjeéhtih, ded pah jwí jummat pínahdih jwí túi jéih jwuhcan caá. Jesucristo ā jígohochah, caandíh ennit, ded pah ā jummatdih jwí túi jéihbipna caá. Pániñ jéihnit, caán ā jummat pah muntih, jwiítbut jwí jummat pínahdih jwí jéihna caá. <sup>3</sup>Det Jesucristo ā jwúub dei jüúwát pínahdih páinitboó yeej cháj cádahnit, ā túi chájat pah muntih í túut nuunná caá.

<sup>4</sup>Nihat yeej chájnitoobó Dios ā wutatdih yap yohnit caá. Dedé yeej chájat Dios ā wutatdih yap yohat ā jumna caá.

<sup>5</sup>Cáacwā í yeej chájatdih yohni pínah Cristo ā cáac jummatdih ñi jéihna caá. Caánboodíh yeejat wihcan caá.\* <sup>6</sup>Ded Cristo bícdih jumni páantjeh ā yeej chájca bojo naáh. Obohjeéhtih, ded yeej

\* 2.15 Stg 1.27 \* 2.20 1Co 2.10-16 \* 3.1 Jn 1.12 \* 3.5 Jn 1.29

chäj cádahcan, Cristodih jéihcan, áih nihcan caá. <sup>7</sup>Wā oinitá, yeebdíh yeenitdih ñi joyáh bojoó. Nihat túi chäjnit Jesucristo yoobópdih á jumat pah mantih, queébtat yoobópdih í jumna caá. <sup>8</sup>Obohjeéhtih, yéej chäjnioboó nemépwā í maáih á jumna caá. Nemépwā í maáh bácah, bíihmahjeh yeejép chäjni caá. Páant á chäjatdih yoh beedáni pínah Dios wúéh nin baácboó át cáac jumup tají.\*

<sup>9</sup>Det Dios weh jumna, jwí íp Dios á jenah joyát pah queétdihbut át jenah joyát tútup taga. Pánih jenah joinít, á wépat íjeéh á jumuchah, páantjeh í yéej chäjcan níft. <sup>10</sup>Nin pah Dios weh, nemépwā í maáh wehbut í jumatdih ñi jéihbipna caá: Túi chäjcanit, í déewādih oicannit Dios weh nihcan caá. Nemépwā í maáh weh í jumna caá.

#### Jesúhwa í míic oyat

<sup>11</sup>Yeeb Jesucristodih jwiíh jepahnit, “Míic oyat caá náahap”, jwí níj bohéatdih ñi joyóp jí.\* <sup>12</sup>Caán á jumatji pah ñi jumca bojoó. Caán nemépwā í maáih jumna, á úuddih át mao yohop wut jí. ¿Dépanih tigaá á úuddih át mao yohji? ñi jenah joyóchah. Caandíh yeebdíh wā naóhbipna caá. Caán yéej chäjni jumna, á úudboó túi chäjni á jumatdih íjnit, caandíh át mao yohop wut jí.\*

<sup>13</sup>Páant tigaá yéej chäjnitboó yeebdíh í enihcan caá. Pánihna, í en jüihñuchah, “¿Dépanih tigaá weemdíh í en jüih?” ñi níj jenah joicá bojoó. <sup>14</sup>Yeejép chäjnit, iiguírna bejnit pínah jwí jumup yuh jí. Obohjeéhtih, buu jeáboó bejnit pínah jumna, táiniboodíh túut nnumná caá jwí chäjap. Jesúhwādih oina, jwiítdih á túut nnumátdih jwí jéihna caá. Ded cáacwādih oicanni iiguírna bejni pínah á jumna caá.\* <sup>15</sup>Ded á déedih enihcan, mao yohíhat jenah joyát caá caandíh á jumup. Pánih jumna, Dios á enechah, cáacdih mao yohni bíic yoobó á jumna caá. “Ded mao yohni Diosjeéh páantjeh á jumcan níft”, ñi níj jéihna caá. <sup>16</sup>Ded pah oyat á jumatdih nin pah jwí jéihna caá: Jwiítdih

búdí oina, Diosjeéh páantjeh jwí jumat pínah niijná, Jesucristo jwiítdih á wun wáhup jí. Páant á wun wúhatdih náhninit, “Caán oyat yoobát caá”, jwí níj jéihna caá. Pánihna, jwiítdih wunna yuhna, jwí déewādih túi oinit, teo wáacat caá náahap.\* <sup>17</sup>Dawá bíi dée bíbohni, á dée panihni moh yeejndih enna yuhna, caandíh jígah en teo wáaccan, Diosdih á oican caá. <sup>18</sup>Pánihna, wā weh panihnitá, “Bitadih wā oina caá”, niijná, jacjeh pohba niijcát caá náahap.

#### Úumcanjeh, Diosjeéh jwí jumat

<sup>19</sup>Cáacwādih túi oina, Diohwa jwí jumatdih jwí jéihna caá. Pánihna, á peéh chäjat pínahdih úumcanjeh, ájeéh jwí túi jumna caá. <sup>20</sup>“Yeejat jüib weemdíh á jumna nacaá”, jwí níj jenah joyóchah yuhna, Dios nihadidih jéihni jumna, jwí jenah joyátdihbut á túi jéihna caá. Pánih jéihna, áihwā jwí jumatdih jwí túi jenah joyát pínah niijná, jwiítdih á teo wáacbipna caá. <sup>21</sup>Wā oinitá, “Dios wā yeejatdih át yoh tagaá”, níj jenah joinít, úumcanjeh, Diosjeéh jwí túi jumna caá. <sup>22</sup>Pánih jumnit, Dios á wutatdih jepahna, á weñat pínahdih jwí chäjachah, caandíh dedé jwí úúbdíh jwiítdih á wúhbiipna caá. <sup>23</sup>Nin pah jwiítdih á wutna caá: “Wā wúéh Jesucristodih túi jenah joinít, bita áihwādihbut ñi oyoó”, át niijp wut jí.\* <sup>24</sup>Dios á wutatdih túi jepahnitboó ájeéh í túi jumna caá. Dios íjeéhbut á túi jumna caá. “¿Dios wájeéh á jum níft?” jwí níj jéihhichah, Dios jwiítdih á wúhni Táini Espiritu “Jújuh, Dios majeéh á jumna caá”, á níj jéihyana caá.

#### Cristodih enihcannitdih ded pah jwí jéihyat

**4** <sup>1</sup>Wā oinitá, “Táini Espiritu weemdíh nin pah á níj naáwát túutna caá”, níj yeenit, dawá í jumna caá. Pánihna, Dios á naáwát túutni á jumatdih jéihyat túut niijná, ded pah á naáwátdih ñi túi joyoó. Dios naáwát bíic yoobó á naóhcah, ñi joyáh bojoó. <sup>2</sup>Yoobópdih Táini Espiritu á naáwát túutni nin pah á níj naóhbipna

\* 3.8 He 2.14-15 \* 3.11 Jn 13.34; 15.12 \* 3.12 Gn 4.8 \* 3.14 Jn 5.24 \* 3.16 Jn 15.13  
\* 3.23 Jn 13.34; 15.12,17

caá: “Jesucristo jwiít panihni cáac jumna yuhna, Diosjeh át jumup wut jī”, ā niijbipna caá. Páant niijní Dios ā wahní ā jumna caá. <sup>3</sup>Obohjeéhtih, nemépwā ī maáh ā wahniboó, “Jesús Dios nihcan caá”, ā niijbipna caá. Páant niijní Dios ā wahní nihcan, Cristodih en jühnihi caá. Cristodih en jühnihiwā dawá ī jummat pínah doonádih nítát joi tágaa. Bwū nin baácboó dawá ī jumna caá.\*

<sup>4</sup>Obohjeéhtih, yeebboó, wā oinitá, Diohwā nī jumuchah, Túini Espíritu nījeéh ā jumna caá. Jesúsdi h jephacannit, nemépwā ī maáh ā wēpat chah, Túini Espírituboó ā wēpna caá. Pánihna, yeebdíh ī yee naáwáchah yuhna, caán ā wēpatjīh queétdih yah yohnit nī jumna caá. <sup>5</sup>Queétdioó Diohwā nihcan, ī bohéatbut Diofih nihcan caá. Bitá Diofih nihcannit, ī bohéatdih ī túi wēi joiná caá.\* <sup>6</sup>Obohjeéhtih, Diohwā jumna, ā naáwátdih jwí bohénachah, áihwāboó jwiítdih ī túi wēi joiná caá. Diosdih jéihcannitboó, jwí naáwáchah, ī joíhcan caá. Pánihna, Dios naáwátdih ded yoobópdih bohéni, ded yee bohéni ā jummatdih nī jéihbipna caá.\*

#### Dios oini caá

<sup>7</sup>Wā oinitá, oyat wēpat Dios jwiítdih ā wūhuchah, bitá áihwátdih jwí oi jīh. Det bitadih túi oinit Dios weh ī jumna caá. Pánih jumnitjeh Diosdih jéihnit, ájeéh ī túi jumna caá. <sup>8</sup>Dios oini ā jumuchah, bitadih oicannit, Diosdih jéihcan, ájeéh ī jumcan caá. <sup>9</sup>Dios ā wūéh bífc jumnidih nin baácboó át wah deyanap tajī, ā wēpatjīh Diosjeéh wēnit, páantjeh jwí jummat pínah niijná. Pánih chájna, ded pah ā oyatdih jwiítdih át jéihyanap tajī.\* <sup>10</sup>Oyat yoobát nin pah caá ā jumup: Diosdih jwí oyat pah nihcan, jwiítdih Diosboó ā oyat pah caá oyat yoobát ā jumup. Jwiítdih búdí oinit, jwí yéejat jīb iiguipna bejat déejidih túi ubat táut niijná, Dios ā wūéhdi h át wun wūhat táutup wut jī.

<sup>11</sup>Wā oinitá, Dios jwiítdih caan páh búdí ā oyochah, jwiítdih túi mífic oyat

caá náahap. <sup>12</sup>Nihat Diosdih encannit jwí jumna caá. Obohjeéhtih, jwí mífic oyochah, Diosjeh jwíjeéh ā jumna caá. Páant ā jumuchah, ā náah yacat pah ā oyatjīh bitadih jwí túi teo wáacna caá.\* <sup>13</sup>Dios jwiítdih áih Túini Espíritudih át wūhup taga. Páant jwíjeéh ā jumuchah, “Dios bícdih wā jumna caá. Wájeéh caanbát ā jumna caá”, jwí níj jéihna caá.\* <sup>14</sup>Jwí íp ā wūéhdi h nin baácboó át cáac jummat táutup tajī, cáacwátdih ā túi ubat pínah niijná. Páant ā cáac jummat táutnijidih jwiítdih jwí enep jī. Pánih ennitji, bitadih jwí jéih naóhna caá.\* <sup>15</sup>“Jesús Dios wūéh caá”, niijníjeh Diosjeéh ā túi jumna caá. Diosbut ájeéh ā túi jumna caá.

<sup>16</sup>Dios jwiítdih ā oyatdih jwí jéihna caá. Pánih jéihnit, caandíh jwí túi jenah joiná caá. Dios nihat cáacwátdih búdí ā oina caá. Pánihna, ded bitadih oini Dios bícdih ā jumna caá. Diosbut ájeéh ā jumna caá. <sup>17</sup>Pánih Dios bícdih jumna, caandíh, bitadihbut jwí túi oina caá. Pánih oina, cáacwā ī yéejat jīb peéh chájat yeó jáapdi h úumcanjeh, jwí túi jumtipna caá. Cristo ā íp Dios bícdih ā jumuchah, jwiítdih nin baácboó jum jwuhna, bífc yoobó caán bícdih jwí jumna caá. Pánih jumnit, ā jwáub dei jūwúchah, jwí úumcan níft. <sup>18</sup>Ded Diosdih oini ā oyatdihbut jéihna, caandíh ā úumcan níft. Pánih túi oina, jwí oinidih jwí úumcan caá. Obohjeéhtih, bífhdih úumna, caán ā peéh chájat pínahdih jwí úum jenah joiná caá. Pánihna, jwí úumnidih jwí oican caá.

<sup>19</sup>Dios jwiítdih ā oi waáwáchah, jwiítdihbut caandíh, bitadihbut jwí jéih oina caá. <sup>20</sup>Ded ā dée panihnidih eníhcan, “Weém Diosdih wā oina caá”, niijná yuhna, ā yeena caá. Bífhdih enna yuhna, ā oican, Dios ā enca naáhdih ā jéih oican caá. <sup>21</sup>Pánihna, nin pah jwiítdih Jesucristo ā níj wutup jī: “Ded Diosdih oina, ā dée panihnidihbut oyat caá náahap”, ā niijp jī.\*

\* 4.1-3 Mt 7.15; 2Jn 7 \* 4.5 Jn 15.19 \* 4.6 Jn 8.47 \* 4.9 Jn 3.16 \* 4.12 Jn 1.18  
\* 4.13 Ro 8.9; 1 Jn 3.24 \* 4.14 Jn 3.17 \* 4.21 Mt 5.44-45; Mr 12.29-31

### Dios weh yéejatdih ī yap yohat

**5**<sup>1</sup>Det Jesúsdih “Dios ā wahni Cristo caá”, niijnít, Dios weh ī jumna caá. Det jwí fip Diosdih táí oinit, ā wehdihbut ī oina caá. <sup>2</sup>Diosdih oina, ā wutatdih jepahnit, ā wehdihbut jwí oyat yoobópdih ā jummatdih jwí jéihna caá. <sup>3</sup>Ā wutatdih jepahnajeh, Diosdih jwí táí oina caá.\* Caandíh oina, jwiítidih ā wutat wái náah jumni nihcan caá.\* <sup>4</sup>Det Dios weh jumna, yéej chájatdih ī jéih yap yohna caá. Jesucristo ā wēpatdih táí jenah joiná, Diosdih jéihcannit ī jenah joyát pah, jwí jenah joicán niit. <sup>5</sup>“Jesús Dios wūúh caá”, niíf jenah joiníjeh yéejatdih náahcan, ā yap yohna caá.

### Dios wūúh ded pah ā jumat

<sup>6</sup>Jesucristo nin baácboó āt cáac jumap tají. Ā tewat pínah játih, Juan Daabánidih ā daabáát tūtutap jī. Tútímah, cruzboó wun wūhna, áih meépdih ā yohop jī. Pánihna, mahjīh ā daabáátidih, cruzboó áih meép ā yohatdihbut náhninit, Dios wūúh ā jummatdih jwí jéihna caá. Túini Espíritubut “Nin Dios wūúh tigaá”, jwiítidih ā niíf jéihyana caá. Caán Túini Espiritu yeeacan, yoobópdih naóhni caá. <sup>7-8</sup>Pánihna, Jesús Dios wūúh ā jummatdih nit bífc peihcannit jéihyanit ī jumna caá: Túini Espiritu jwiítidih ā jéihyanachah, mahjīh ā daabáátjidih, áih meép ā yohatjidihbut jenah joinít, Jesús Dios wūúh ā jummatdih jwí jéihna caá. <sup>9</sup>Cáacwājeh ī naáwáchah joiná, “Caán yoobópdih tigaá”, jwí niijná caá. Páant niijnítidih jwí joiná yuhna, jwí fip ā wūúhdih naóhna, cáacwā ī naáwát chah ā jumuchah, caánboodíh túi joyát caá náahap.\* <sup>10</sup>Dios wūúhdih ded túi jenah joiní “Jesús Dios wūúh ā jummat dooná yoobópdih tigaá”, ā niíf jéihna caá. Obohjeéhtih, Dios ded pah ā wūúhdih ā naáwátidih joyáh bojní “Dios yeeni caá”, ā niijná caá. <sup>11</sup>Nin pah Dios jwiítidih ā niíf jéihyana caá: “Wā wūúhdih túi jenah joinít, páantjeh wājeéh ní jumtipna caá”,

ā niijp jī. <sup>12</sup>Dios wūúh Jesúsdih ded túi jenah joiní, Diosjeéh páantjeh ā jumna caá. Obohjeéhtih, ded Jesúsdih jepahcanni, Diosjeéh ā jumcan niit.\*

### Juan ā pée naáwát

<sup>13</sup>Yeéb Dios wūúhdih táí jenah joinítidih naóh daácna caá wā chājap, páantjeh Diosjeéh ní jummat pínahdih ní jéihyat pínah niijná.\*

<sup>14</sup>Dios ā náahat pah caandíh jwí wūúbuchah, jwiítidih ā joyátidih jwí táí jéihna caá. Pánih jéihna, wūmcanjeh caandíh jwí wūúbhna caá. <sup>15</sup>Páant ā joyátidih jéihna, “Wā wūúbátidih āt wūh tagaá”, jwí niíf jéihna caá.\*

<sup>16-17</sup>Yeéb ní dée panihni ā yéej chājachah ennit, Diosdih ní wūúbú, ā yéejat jīib caandíh iiguípna ā wahcat pínah niijná. Páant ní wūúbuchah, Dios caandíh ā túut nuumbípna caá, ájeéh páantjeh ā jummat pínah niijná. Obohjeéhtih, ded Cristodih páantjeh náahcan, yap yohnit, áihwádhbut eníhcan, iiguípna ā bejbipna caá. Pánihmiboodíh ní wūúbát pínahdih wā wutcan caá. Nihat yéej chájat Diosdih yap yohat miic caá. Obohjeéhtih, bíh yéej chájat iiguípna ā bejat tūtutcan caá. Pánih chájnitidih caá wūúbát náahap, ī túut nuumát pínah niijná.

<sup>18</sup>Dios wūúh Jesús áihwádh ā táí en daoná caá, nemépwā ī maáh queétdih ā yéejacat pínah niijná. Pánihna, “Dios weh páantjeh ī yéej chājcan caá”, jwí niíf jéihna caá. <sup>19</sup>“Jwiítboó Diohwa jwí jumna caá. Obohjeéhtih, nihat Diosdih náahcannitdih Satanás caá ā wutap”, jwí niíf jéihna caá. <sup>20</sup>“Dios wūúh nin baácboó cáac jumnit, Dios yoobátidih jwí jéihyat pínah niijná, jwiítidih ā jéihyanap jī”, jwí niíf jéihna caá. Pánihna, Diosjeéh túi jumnit, ā wūúh Jesucristojeéhbut jwí táí jumna caá. Jesucristo Dios yoobát jumna, páantjeh Diosjeéh jwiítidih ā táí jummat tūtutna caá.\* <sup>21</sup>Wā weh panihnitá, iní táí chāja chaáh!

Pāpnidih ní wēi wūúbhca bojoó.  
Páant bóojeh tigaá wā naáwát.  
Juan

\* 5.3 Jn 14.15; 2Jn 6 \* 5.3 Dt 30.11; Mt 11.30 \* 5.9 Jn 5.32-37; 8.18 \* 5.12 Jn 3.36

\* 5.13 Jn 20.31 \* 5.14-15 Mt 7.7-11; Lc 11.9-13; Jn 15.7,16; 16.23-24; 1Jn 3.21-22

\* 5.20 Jn 17.3